

Nunatta maannamut taaguutaa "Kalaallit Nunaat" "Inuit Nunaat"-nik taarserneqassanersoq pillugu apeqquaqaat aallaavigalugu oqallinnissamut siunnersuut".

(Nikolaj Jerimiassen, Inatsisartunut ilaasortaq)

Akissuteqaat

(Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq)

Nunatta maannamut taaguutaa "Kalaallit Nunaat" "Inuit Nunaat"-nik taarserneqassanersoq pillugu apeqquaqaat aallaavigalugu oqallinnissamut siunnersuut Naalakkersuisut qujassutigaat.

Siunnersuuteqartup ukiup siusinnerusuani § 37 naapertorlugu Naalakkersuisunut apeqquaqarneranut atatillugu pineqartoq sammineqarpoq. Naalakkersuisoqarfik apeqquaqaatip taassuma suliarineranut atatillugu Oqaasileriffimmut nassiuppaa, paasiniarlugu Kalaallit Nunaanni Nunap Aqqinik Aalajangiisartunit nunap taaguutaa suliarineqarsimanersoq. Apeqquut imartooq pineqarmat Kalaallit Nunaanni Nunap Aqqinik Aalajangiisartut sukumiinerusumik misissuiniarlutik aalajangerput, tamannalu suliffeqarfiit inuillu susassaqtartut suleqatigalugit ingerlanneqassaaq. Naalakkersuisut misissuinerup inernissaa qilanaaraat.

Nunap taaguutaa pillugu oqallittarneq piffissap ingerlanerani assigiinngitsunut ataneqartillugu soorlu atuagassiani, eqqumiitsuliornikkut kulturikkullu saqqummersitani qaqilerneqartarpoq Inatsisartunilu oqallisigineqarluni. Taassuma saniatigut oqallinnermi misigissutsit annertuumik ilaatinneqartarput, apeqquut assigiinngitsunik isumaqarfigineqarsinnaasarmat.

Naalakkersuisut apeqquummut tunngatillugu pissutsit makku eqqarsaatigineqartariaqtartut erseqqissaatiginiarpaat, tassalu nunarput Inuit Nunaat-nik taaguuserneqassanersoq. Naggueqatigut issittup immikkoortuaniittut Canadami, Alaskami, Chukotkami Ruslandimilu taaguut Inuit tassungaluunniit assingusut aamma atorpaat. Kalaallit Nunaanni innuttaasut nunap taaguutaanik Inuit Nunaat-nut allanngortillugu aalajangiissagaluarpata, Kalaallit Nunaanni innuttaasut taaguummik taassuminnga kisermaassisuunissartik naatsorsuutigisinnaangilaat. Taamaattumik naggueqatitsinnut ataneqartillugu taaguummik atuineq piginnittussaataanerlu isumaliutigissallugit pissusissamisoorpoq.

Naalakkersuisut isumaqarput nunatta taaguutaata allanngortinnissaanut apeqquut maannakkut isummerfigineqartariaqanngitsoq. Pineqartorli siunissami tunngaviusumik inatsisiliornissamik ataatsimiititaliap qaqilersinnaassagaa, kommissionimik taamaattumik pilersitsisoqarnissaanik aalajangertoqassappat. Taamaattoqanngippat nunatta taaguutaanik allanngortitsinissaq pillugu naggueqatitta akuersinissaannik imaluunniit akerliunissaannik naliliinissaq utaqqimaqqartariaqarpoq. Qanorluunniit ikkaluarpat innuttaasunit sukumiisumik oqallisigineqaaqqaartinnagu, apeqquummik taassuminnga allannguisoqartariaqanngilaq.

Taamatut oqaaseqarlunga Inatsisartut pitsaasumik kingunissalimmillu oqaluuserinninnissaannik kissaappakka.